

Date – 21/12/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Kristian te hunpui Krismas inbuatsaihna chuan a vawr tawp a thleng chho mek a, nizan pawh khan hunpui lo thleng tur denchhen hian Mizoram hmun hrang hrangah Kohhran, YMA leh thianho ten tunlai hian Krismas Carol an nei thin.**
- 2. Mizoram Journalists' Association (MJA) chuan nimin khan Civil Hospital Aizawl leh Zemabawk-a Cancer Hospital-ah MJA Charity Fund atanga a pawisa hmuhte chu an hlan.**
- 3. Good Governance Week 2024 chu Mizoram district hrang hrangah nimin khan hawn a ni.**
- 4. Union Minister for Development of North East Jyotiraditya Scindia chuan nimin khan Union Home Minister Amit Shah-a kaihhruaina in he bial hmasawna turin lungphum thar vawiin hian a phum dawn tih a sawi.**



KRISMAS CAROL

Kristian te hunpui Krismas inbuatsaihna chuan a vawr tawp a thleng chho mek a, hunpui lo thleng tur denchhen hian Mizoram hmun hrang hrangah Kohhran, YMA leh thianho ten tunlai hian Krismas Carol an nei thin.

Aizawla Bethlehem Vengthlang Branch YMA pawhin Section hrang hranga inthenin Krismas Carol hi an nei thin a, an veng chhunga In hrang hrangah Pathian fakna hla an sa kual a, zaninah pawh an chhunzawm leh ang, an pawisa hlauh chhuah te chu mi hrasa zawk hnenah Krismas Chibai buk nan an sem chhuak leh dawn a ni.

Aizawl khawpui chhunga YMA Branch lian zinga mi Electirc Veng Branch YMA pawhin Krimas Carol hi an nei tawh a, an veng chhunga an zaina atangin cheng nuai thum chuang an hmu chhuak a, YMA pawisa neih sa nen cheng nuai li sing thum leh sang nga chu an sem chhuak leh dawn a ni.

Akashvani Aizawl News zawhna chhangin, Electric Veng Branch YMA President kal chhuak ta Pu C. Lalrokhuma chuan, an pawisa hmuh chhuah te chu an veng chhung khawsak harsa mi 32 leh veng chhunga ruihhlo vanga harsatna tawk te, damlo na zual leh chhawmdawna in pahnih-ah an pe chhuak dawn tih a sawi.



MJA CHARITY FUND

Mizoram Journalists' Association (MJA) chuan nimin khan Civil Hospital Aizawl leh Zemabawk-a Cancer Hospital-ah MJA Charity Fund atanga a pawisa hmuhte chu an hlan.

MJA General Hqrs. hian kum tin Krismas dawn apiangin mi harsate tanpui nan Charity Fund hi an thawhkhawm thin a, kumin pawh hian MJA member thahnem bakah pawn lam mi thenkhatin sum hi an thawh khawm a, heta an sum hmuh atang hian Civil Hospital Aizawl Poor Fund-ah cheng sing 5 leh Zemabawk-a Cancer Hospital Poor Fund-ah cheng sing 3, sang 7 leh 370 an hlan a ni.

Civil Hospital Aizawl-a Poor Fund-a sum hlanna inkhawmah hian MJA President, Pu C. Lalrambuatsaiha chuan, Civil Hospital Aizawl chu Mizoram mipui nawlpui, hmun hrang hrang awmtan an pan khawm, khawsak harsa zawkte'n an pan khawm ber a nih thu a sawi a. He damdawi-in pantute zingah mi harsa tak tak an awm thin a, chung mite chu damdawi-in a thawkten damdawi leinate an tumsak thin tih an hriat thu sawiin, chung mi harsate tanpuina atan sum hi hlan a nih thu a sawi.

Zemabawk Cancer Hospital-a tanpuina hlannaah Nursing Superintendent, Lalrinpari chuan, an damdawi in chu Cancer veite pan khawm an ni a, Cancer chu inenkawl a hautak a, damlo zingah khawsak harsa tak tak an awm thin avangin mi inphalte sum thawhkhawm hmanga inenkawl ve tawk tawk an awm thin tih a sawi a. Kumin January atanga November thleng khan Poor Fund-ah cheng nuai 10, sang 6 leh 464 an hmu a, an sum remral erawh cheng nuai 22, sing 7, sang 6 leh 623 a tling tih sawiin, MJA in tanpuina an hlan chu an lawm hle tih sawiin, damlo engemaw zatin tangkai taka an hman tur thu a sawi.

MJA hian nimin khan an member kum 70 tling chin mi 9 hnenah krismas thilpek an hlan bawk.



CHRISTMAS PREPARATION

Karleh maia Kristian te hunpui, Krismas lo thleng turah mipuite kawng hrang hrangin an inbuatsaih mek a, midangte tana luangchhuak mi thanhnem tak an awm niin kan Corr chuan a sawi.

VC OF Rodi Lalremruati Zote, Akashvani Correspondent.....

Aizawlah chuan bazar hmun hrang hrangah mipui an pungkawm hnem tawh hle a. Aizawl Bazar a sumdawngte chuan kumin krismas chu mi veivak leh bazar tam tho mahse kum dang zawng aiin sum leng vak a vang ni a an hriat thu leh hei hian inhralh a tih har thu an sawi thung a. Akashvani palaiin a kawmna ah Pi Zonunsangi chuan, kum dang ang bawkin zing dar 6 atanga tlai dar 5 thleng an in hawn thin thu a sawi a. Krismas bazar lai te a nih angin sumdawngte pawn thahnem an ngai hle a, chutih rualin kum dang zawng aiin kumin krismas bazar chu mipui veivak tam ang hu in inhralh a har thu a sawi a ni.

Aizawl Municipal Corporation (AMC) chuan kumin Krismas leh Kumthar vuakvet atana AMC area chhunga kawng leh kawthler chei kawng hma la tha zual 10 te hnenah lawmman atan cheng sing 5 theuh a pe dawn a. Nimin thleng khan veng hrang hranga kawng chei te endik niin Thawhtanni hian lawmman sem a ni dawn a ni.

<><><>

AR

Assam Rifles-te chuan nimin khan Siaha District chhunga thingtlang khaw pakhat Thingsena chengte tan, nunphung hrisel zawk an hman theih dan tur an zirtir.

Assam Rifles hian an awmna hmun leh a vela mipui te tan kawng hrang hrangin tha an thawh thin a, tun tumah pawh hian mipui te chu ei leh in tur hrisel leh nun dan phung hrisel zawk an zirtir a, mipui te chuan an hriat duh zawng zawtin hun an hmang ho a ni.

He huna kalte chuan hlawkthlak an ti hle a, an thil zir leh hriatte chu an nitin hun hman naah pawh an chhawr tangkai ngei a rinawm.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Chaghnudar 2 leh a chanve-ah Chanchinthar puan leh a ni ang.

<><><>

RS MP

Parliament Winter Session neih zawh takah Mizoram Rajya Sabha MP Pu K. Vanlalvena zawhna chu Union Minister pathumin an chhang a. Manipur chungchanga a zawhna erawh Home Minister-in a chhang lo thung a ni.

Mizoram chhim tawp leh Bay of Bengal tuifinriat kal pawhna tura kawngpui sial mek KMTTP Road project ah kumin November thla thlengin cheng vaibelchhe 356 hman ral a nih tawh thu te, KM 109 laih turah KM 70 a thui laih mek a nih thu te, KM 20 lei laih hna zawh a nih tawh thu leh July thla 2025 a zawh hman tura ruahman a nih thu Union Minister of State for External Affairs Pu Kirti Vardhan Singh chuan K.Vanlalvena zawhna a chhang a. Mizoramah Oil leh Natural gas zawn chhuahna hna thawh mek a la ni em tih K. Vanlalvena zawhna chu Union Minister of State for Petroleum Pu Suresh Gopi chuan chhangin Mizoram chu Block thumah thenin ONGC leh Vedanta Company ten an la thawh mek thu a sawi bawh a. Union Minister of State for Commerce and Industry Pu Jitin Prasada chuan Indo-Myanmar ramri ah leh Indo-Bangladesh ramriah te insumdawn tawna te nau Border Haat din a la nih loh thu in K. Vanlalvena zawhna a chhang bawh a ni.

Parliamentary Committee on Railways meetingah K. Vanlalvena chuan Bairabi to Sairang rel kawng siam mekah chungkaw 6 te hnenah zangnadawmna pek an la nih loh avanga Guwahati High Court Aizawl Benchin pe tura order a chhuah tawh hnuah pawh Railway lamin an la pe lo reng chu

dik lo a tih thu a sawi a. Sihhmui a Rel Station Platform siam hna leh Sairang Kurung chung a Railway bridge siam hna thawh lai chu contractor ten an thawh muan thu meeting member te a hriat nawn tir leh bawk a ni.



GOOD GOVERNANCE WEEK

Good Governance Week 2024 chu Mizoram district hrang hrangah nimin khan hawn a ni.

Aizawlah chuan Bawrhsap Pu Lalhriatpuia hovin DC pisa tualah Good Governance Week hi hawn a ni a. Aizawl DC Office a thawkte tan Good Governance Practices workshop buatsaih a ni a. Bawrhsap chuan sorkar inrelbawlna chu mipui rawngbawlna a ni tih vawng reng chungin theihtawp chhuah tur an nih thu a sawi a ni.

Lawngtlaiah chuan DC Conference Hall-ah Bawrhsap Pu Cheemala Siva Gopal Reddy kaihruaiin hun hman a ni a, Good Governance Practices tih thupui hmangin workshop buatsaih a ni. Lawngtlai Bawrhsap chuan Good Governance a tak a kalpui turin sorkar hnathawkte an pawimawh thu sawiin mipuite tana thawk an nihna hre reng turin a chah a ni.

Hnahthialah pawh Good Governance pual hian DC Conference Hall-ah Bawrhsap Pi Rita Lalnunmawii ho a hun hman a ni a. Bawhsap chuan sawrkarah inrelbawna chak leh tha zawk a awm theih nan Public Grievance Redressal system tha tak a awm a tul thu leh Service Delivery tha zawk neih a pawimawh thu a sawi a ni.

Serchhipah pawh Bawrhsap Pu Paul L. Khuma hoin Serchhip DC Pisapui Hall-ah Good Governance Week hawn a ni a. Raltlan mi 558 te hnenah tanpuina buhfai leh sum semchhuah a ni.

Khawzawl-ah chuan DC Conference Hall-ah Bawrhsap Pu K. Vanlalthiana hoin Good Governance Week 2024 pualin hun hman a ni a. Bawrhsap chuan mipuite vuivaina leh an harsatna a tam thei ang ber chinfelsak turin sawrkar hnathawkte a beisei thu a sawi a ni.

Saitualah pawh District Bawrhsap Dr. Lalingura Tlau ho in hun hman a ni a. Bawrhsap chuan sorkar hnathawkte chu mipui tana hnathawk tur an ni tih hria a, mipui dawrna kawngah pawh fel leh hawihhawm inzirtir a tul thu a sawi a ni.

(Sorkar laipuiin a ruahman angin Good Governance Week 2024 hi tun thla ni 19 atanga ni 24 chhunga hman tur a ni a, kumin thupui atan hian Prashasan Gaon Ki Ore - Thingthlanga inrelbawlna tha thlen tih hman a ni.)



UNION MINISTER

Union Minister for Development of North East Jyotiraditya Scindia chuan nimin khan Union Home Minister Amit Shah-a kaihruaina in he bial hmasawna turin lungphum thar vawiin hian a phum dawn tih a sawi.

Agartala MBB airport-a thuthar thehdarhtute a kawmnaah Pu Scindia chuan nakinah North East Region-ah hmasawanna nasa tak a thleng dawn tih sawiin, Prime Minister Narendra Modi-a'n a lo ngaihtuah tawh a ni a ti. Kum kalta chhunga NEC hnathawh dan leh he bial aṅanga state-te duhthusam tihhlawhtlinna tur chungchang sawihona neih a nih tur thu a sawi bawk. Pu Scindia chuan Union Home Minister chuan hmarchhak biala economy tihchakna tura buatsaih banking summit pawh a kaihruai dawn tih sawiin, Banking summit-ah hian sorkar leh private bank zawng zawng leh an hotute an tel dawn a ni a ti a, Hmarchhak biala bank branch leh banking system-a deposit record zat pawh uluk taka thlirletna neih a nih tur thu a sawi bawk.

<><><>